

Durante e santo sacrificio di Misa San Francisco..


BUNITA PRESENTACION DI GRUPO MELANGE Y NOS MUSICONAN PROFESIONAL..

Texto y foto: Poets

DEN AMBIENTE

** Durante e Santo Sacrificio di Misa San Francisco riba e diadomingo mainta di Pasco di Resuracion, tur esnan cu a atende e Santo Sacrificio di Misa, a ser deleita den un forma sumamente agradable y celestial pa Grupo Melange dirigi pa Maybeline Arends-Croes, kendenan a ser acompaña den un forma magnifico pa e tremendo orquesta forma

pa nos musiconan profesional: Delbert Bernabela (steelband/sax/clarinet), Johnny Scharbaay (piano), Chucho Hoek (guitar), Freddy Gollarza (drum) y Ebby Peterson (percusion). E musiconan aki ta sirbi como un ehempel pa e demas musiconan, pa corda pone tempo tambe pa sirbi Dios Tata Todopoderoso..



PREMIO PADU DEL CARIBE TA RINDI UN HOMENAJE SPECIAL NA "THE THREE VOICES"..

THE THREE VOICES representa pa Tobias "Toby Lampe", Gilbert "Boy" Wout y Humphrey Balootje, lo ta presente durante e grandioso anochi di PREMIO PADU DEL CARIBE '97, pa asina ricibi nan merecido homenaje dilanti e pantaya di Tele Aruba y tur esnan presente den Cas di Cultura.

E fenomenal trio aki durante e epocanan di '60 y '70 tabata un di e bandanan mas favorita y aclama pa e juventud. Awe keto bay nan ta treciendo grato recuerdonan den diferente reflection party tanto na Curacao como aki tambe na Aruba den vez encuando.

Tabata na aña 1955 porcierto dia 16 di april cu e banda aki a nace, despues cu Toby Lampe a haya un guitarra spaño for di su omo, kende den e tempo ey tabata gusta toca e musica di Tango di e famoso cantante argentino Carlos Gardel. Hunto cu su dos amigonan Boy Wout y Stanley Braaf, e nomber di THE THREE VOICES a nace.

Tabata durante campvuur organiza pa padvinderan, nan a cuminsa ta toca ranchera, bolero, country music y rock & roll. Asina nan a sigui duna presentacionnan pa amigonan y conocirnan y tambe pa diferente serenatanan.

Nan prome apariencia publico tabata durante e transmision di Radio Curom den e show del Jueves", pa cual show tambe a duna nan presentacion Conjunto Estrellas del Caribe y Conunto San Jose. E prome salida publico aki a resulta den un exito y di e forma aki nan a cuminsa toca den diferente clubnan, hotelnan di clase y tambe pa diferente shownan di television. Pa un periodo largo

The Three Voices a produci nan propio programa di TV cu tabata yama "The Shinding Show", cual tabata ser realiza live den un forma espectacular for di Roxy Theater.

THE THREE VOICES tabata e prome beat-band cu guitarra electronico den Antiyas Hulandes. Nan tabata toca tur sorto di musica y ritmo. Despues mas beat-band a sigui nan manera e.o. The Three Aces, Telstars, The Heartbreakers, The Vampires, Los Hondas, The Impressions, Spacemasters, The Dangers y mucho mas.

The Three Voices a bishita Aruba Aruba den masha hopi ocasion, cual temponan ey nan tabata presenta mano a mano cu e mihor beat-bandnan di Aruba manera: The Creole Cats (cu Julio Bernardo Euson), The Magnificent Five (cu Ossy Figaroa), The Golden Treasures y The Aftermaths.

Den e temponan ey e contestnan entre e beat-bandnan tabata tuma lugar den Roxy Theater y tur biaha nan tabata sali number 1. Tambe den e final entre e beat-bandnan Antiyano, The Three Voices tabata sali number 1. Tambe nan tabata gana premio como mihor vestuario, coreografia, mihor presentacion, y e banda cu mas harmonia.

THE THREE VOICES a yega di presenta den diferente paisnan manera e.o. Venezuela pa e prestigioso programa di television di Renny Ottolina na Radio Caracas TV, El Show de Chelique Sarabia, na unda nan a presenta cu Los Impalas (Henry Stevens), Los Dynamites (Rudy Marquez), Los 007, Los Supersonicos, Los Cuatro Monedas, Trio Venezuela (Mirtha Perez),

Cherry Navaro, Myrtha Castellano, Rosa Virginia y Maria Teresa Chacin, Hugo Blanco y tambe den e "Feria de los Vaqueros".

Na Puerto Rico pa e planta di television Puerto Rico durante e show di Luis Mercano. Na Hulanda The Three Voices a presenta den varios ocasion pa tanto actonan di Gobierno Antiyano, como tambe pa studiantenan y diferente night-clubnan.

The Three Voices a presenta cu hopi artistanan famoso manera e.o. Paul Anka, Aretha Franklyn, The Drifters, The Shindogs, Chubby Checker (tur di Estados Unidos), Tito Rodriguez (Puerto Rico), Los Loud Jets (Mexico), The Cats (Hulanda), Los Angeles Negros (Chile), Celia Cruz y Nestor Zavarce (Cuba), Los Impala y Los 007 di Venezuela.

Actualmente keto bay THE THREE VOICES ta activo cu nan miembronan fundador Toby Lampe, Boy Wout y Gee St. Jago. Nan ta presentando keto bay e musica y ritmonan di '60 y '80. Awendia e banda ta consisti di 6 integrante; Boy Wout (lead-guitar/cantante), Toby Lampe (segundo guitarra/cantante), Humphrey Balootje (bass-player/cantante), Billy Adams (key-board/senthsizer), Gee St. Jago (conga/percusion) y Freddy Sadek (drummer/percusion).

Cu refuerso di e demas integrantesnan aki, The Three Voices a bira awor; The Three Voices & Company. Pa PREMIO PADU DEL CARIBE ta un honor y privilegio pa rindi un homenaje na THE THREE VOICES.